

**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ ՀԱՅՈՑ ՑԵՂԱՍՊԱՆՈՒԹՅԱՆ 100-ՐԴ ՏԱՐԵԼԻՑԻ
ՈՓԵԿՈՉՄԱՆ ԱՌԻԹՈՎ ԷԿՈՒՄԵՆԻԿ
ԱՐԱՐՈՂՈՒԹՅԱՆ ԸՆԹԱՑՔՈՒՄ
(28 հոկտեմբերի, 2015 թ., Անգլիա)**

Ձերդ Գերազանցություն ՀՀ նախագահ,
Ձերդ Արքայական Մեծություն,
Սիրելի՛ բարեպաշտ եղբայրներ եւ քույրեր.

Փառք եւ գոհություն ենք մատուցում առ Բարձրյալն Աստված, որ շնորհն ունենք հոգեւոր ավանդույթներով հարուստ Վեստմինստերյան արքայությունում մասնակցություն բերելու Հայոց ցեղասպանության սրբադասված նահատակներին նվիրված էկումենիկ այս արարողությանը՝ Հայաստանի Հանրապետության մեծարգո նախագահ Տիար Սերժ Սարգսյանի, Հայ Եկեղեցու հոգեւոր դասի ներկայացուցիչների եւ հավատավոր զավակների հետ:

Շնորհակալությամբ ողջունում ենք ներկայությունը Ուելսի արքայազն Նորին Մեծություն Չարլզի, ում սերն ու համակրանքը մեր ժողովրդի եւ մեր երկրի հանդեպ զգացել ենք տարբեր առիթներով, ինչպես վերջերս՝ Հայաստան նրա այցելության ընթացքում:

Եղբայրական Մեր սերն ենք փոխանցում Քենթերբերիի արքեպիսկոպոս Նորին Սրբազնություն Ջասթին Ուելբիին, ում հետ կոչված ենք՝ Տիրոջ Ավետարանի լույսը տարածելու եւ քրիստոսավանդ պատգամները իրագործելու մեր ժողովուրդների կյանքում:

Մխիթարություն ենք ապրում, որ միջեկեղեցական համատեղ այս աղոթքով Անգլիկան Եկեղեցին եւ Միացյալ Թագավորության ժողովուրդն իրենց եղբայրական համերաշխությունն են հայտնում մեր ժողովրդին՝ արտահայտելով իրենց հարգանքը Հայոց ցեղասպանության զոհերի եւ սրբադասված նահատակների նկատմամբ:

Սիրելի՛ հավատակից եղբայրներ եւ քույրեր, մեր ժողովրդի սրտում դեռ չի սպիացել վերքը քսաներորդ դարասկզբին Օսմանյան կայսրության իրականացրած ոճրի, որին իրենց ազգային պատկանելության եւ քրիստոնեական հավատքի համար զոհ գնացին մեկ եւ կես միլիոն հայորդիներ:

Մենք կորցրինք պատմական, հինավուրց մեր հայրենիքի մեծագույն մասը, հազարավոր հայեր տարագիր սփռվեցին ողջ աշխարհով: Մեր ժողովրդի նահատակ զավակները մարտիրոսության պսակն ընդունեցին՝ հավատարիմ առաքելական պատգամին. «Եթե արդարութեան համար չարչարուէք էլ, երանի է ձեզ: Բայց... մի վախեցէք եւ մի խռովուէք, այլ Տիրոջը՝ նոյն Ինքը Քրիստոսին սո՛րբ պահեցէք ձեր սրտերում» (Ա. Պետ. Գ. 14):

Այսօր, երբ ոգեկոչում ենք 100-ամյա տարելիցը Հայոց ցեղասպանության, վերստին մեր երախտագիտությունն ենք հայտնում Ցեղասպանությունը ճանաչած ու դատապարտած, ինչպես եւ՝ Եղեռնից մազապուրծ հայորդիներին ապաստան տված բոլոր պետություններին, Քույր եկեղեցիներին՝ դատապարտման իրենց խոսքը աշխարհում բարձրաձայն հնչեցնելու համար: Այս շարքում խորը զգացվածությամբ ենք հիշում, որ Բրիտանական կառավարությունը Առաջին աշխարհամարտի տարիներին դաշնակից պետությունների հետ հայ ժողովրդի հանդեպ իրականացված եղեռնագործությունը որակեց հանցանք մարդկության դեմ: Համաշխարհային քաղաքակրթության մեջ Մեծ Բրիտանիայի ունեցած ներդրումը եւ մարդասիրական արժեքներին նվիրվածությունը վստահություն են ներշնչում, որ Միացյալ Թագավորությունը պիտի շարունակի իր եղբայրական գորակցությունն ու նպաստը բերել մեր ժողովրդի հանդեպ պատմական արդարության վերականգնման գործում:

Սիրելի բարեպաշտ եղբայրներ եւ քույրեր, Հայոց ցեղասպանության ճանաչումը ոչ միայն պատմական մի իրողության, մեկ ժողովրդի հանդեպ կատարված եղեռնագործության դատապարտումն է, այլեւ, առավելաբար, մերժումն ու բացառումն է մարդկության դեմ գործված եւ գործվող բոլոր տեսակի բռնությունների, ոճիրների, որոնց այսօր եւս զոհ են դառնում հազարավոր անմեղ մարդիկ, հատկապես՝ Մերձավոր Արեւելքի երկրներում: Ցեղասպանության ժխտումը կամ աջակցումը ժխտմանը, եղեռնագործ երկրների նկատմամբ զգուշավորության ու սիրաշահման քաղաքականությունը նոր խթան են ցեղասպանության կրկնման համար: Առաքելավանդ պատվիրանն ասում է. «Լուսոյ պտուղներն են բարութիւնը, արդարութիւնը եւ ճշմարտութիւնը: Ստուգեցէ՛ք, թէ որն է հաճելի Տիրոջը. եւ խաւարի անպտուղ գործերին մասնակից մի՛ եղէք, այլ մանաւանդ մերկացրէ՛ք դրանք» (Եփ. Ե. 9-11):

Մեզ համար հոգեւոր խորը գոհունակություն է, որ Վեստմինստերյան արքայությունում համատեղ աղոթքով ոգեկոչեցինք հիշատակը Հայոց ցեղասպանության զոհերի եւ հայցեցինք բարեխոսությունը սրբադասված



Եթե արդարության համար չարչարվեք էլ, նրանի է ձեզ:
Բայց... մի՛ վախեցեք և մի՛ խռովեք, այլ Տիրոջը՝ նույն Ինքը Քրիստոսին սուրբ պահեցեք ձեր սրտերում (Ա. Պետ. Գ. 14)



Հայոց ցնդասպանության 100-րդ տարելիցի ոգնկոչման առիթով Էկումենիկ արարողություն Անգլիայում

նահատակների՝ հանուն մարդկության խաղաղ ու ապահով կյանքի: Հիշատակի արարողության կազմակերպման աշխատանքներում ներդրած ջանքերի համար Մեր գնահատանքն ու օրհնությունն ենք բերում Վեստմինստերյան արքայության վանահայր հոգեշնորհ դոկտոր Զոն Հոլին, Լոնդոնի եպիսկոպոս լորդ Ռիչարդ Չարթրեսին, Մեծ Բրիտանիայի Հայոց թեմի առաջնորդ Գերաշնորհ Տ. Հովակիմ եպիսկոպոս Մանուկյանին:

Մեր գնահատանքն ենք հայտնում Միացյալ Թագավորությունում ՀՀ արտակարգ և լիազոր դեսպան Տիար Արմեն Սարգսյանին արարողության նախաձեռնության և նշանակալի ներդրման համար:

Այս նվիրական պահին աղոթում ենք, որ Բարձրյալն Աստված գորացնի մեր եկեղեցիները՝ Քրիստոսի սիրով մեզ վստահված հոտին ծառայելու, հոգևոր միությամբ միմյանց գորավիզ լինելու և միասնաբար գործելու՝ հանուն բոնություններից ազատ, արդար ու համերաշխ աշխարհի կառուցման:

Մեր աղոթքն է նաև, որ Տերը օրհնի և պահպանի Մեծ Բրիտանիայի Միացյալ Թագավորությունը, նրա գահակալին՝ Նորին Արքայական Մեծություն Եղիսաբեթ Բ. թագուհուն, իշխանություններին, Անգլիկան Եկեղեցուն ու բարեպաշտ ժողովրդին, Իր երկնառաք խաղաղությունը շնորհի համայն մարդկությանը:

Թող Տիրոջ օրհնության ներքո առավել գորանան, արգասավորվեն բարի հարաբերություններն ու համագործակցությունը մեր երկրների և ժողովուրդների:

Եւ թող մեր Փրկչի՝ Հիսուս Քրիստոսի սերն ու շնորհները լինեն մեզ հետ և ամենքի՝ այսօր և միշտ. ամեն:

